

四庫全書

史部

# 欽定四庫全書

史部

欽定八旗通志卷

一百九十一至  
一百九十二

欽定四庫全書

欽定八旗通志卷一百九十一

人物志七十一

大臣傳五十七

漢軍鑲黃旗三郎廷相石調聲王繼文范承勲閩興邦

祖良璧興永朝高其位年遐齡

郎廷相

郎廷相漢軍鑲黃旗人父熙載以軍功授三等輕車都尉崇德元年卒長子廷輔襲次子廷佐仕至

江南江西福建總督自有傳廷相其三子也由監  
生授欽天監筆帖式順治十一年遷宗人府副理  
事官十二年補佐領十三年閏五月遷刑部理事  
官十一月擢河南右布政使康熙二年調四川左  
布政使八年

命為河南巡撫九年疏言宋儒程顥程頤裔有世襲五經  
博士二員流寇亂後絕襲查有程顥嫡裔程宗昌  
程頤嫡裔程延祀應請襲從之十一年丁母憂回

旗守制十四年服闋授江西巡撫尋定遠大將軍  
安親王岳樂軍前奏以江西布政使佟國正授巡

撫

上諭廷相候補是時逆藩耿精忠據福建反廷相兄廷佐  
奉

命總督福建道梗駐浙江金華隨康親王傑書督理軍務  
十五年六月卒於軍

上即擢廷相為福建總督會精忠降餘黨已平而海寇鄭

成功山賊朱寅屢犯郡縣十六年八月同提督段  
應舉副都統瑚圖勒朱寅偽將軍李復貴於同安  
大破之生擒復貴九月同總兵魏茂等勦賊長泰  
縣天柱山戮三百餘擒成功偽副將孫宮其偽總  
督林鳳等俱竄進勦東埭塔潭等處戮偽將軍吳  
田賊遠遁十月朱寅勾海寇劫掠勢甚張廷相遣  
海澄鎮總兵官黃藍等會大兵分三路進勦至灌  
口揚坑大敗賊衆奪營七陣斬千餘擒寅偽將謝

良楊德等六十餘人十七年三月疏言海澄為漳  
泉門戶今海逆登岸竊據玉州等寨復分路犯石  
瑪江東橋諸處臣同副都統瑚圖海澄公黃芳世  
議發滿漢兵往援但漳屬地廣兵單防禦難周請  
勅康親王發兵援剿得

旨海賊分路侵犯宜亟發援師大將軍康親王速增遣大  
兵與郎廷相黃芳世協力固守漳州海澄諸處剿滅海  
寇閏三月朱寅復擁眾數萬據天寶山斷我餉道廷相

遣兵同芳世進勦連敗賊衆斬偽提督楊寧等三十  
十六人擒賊弁百二十餘陣斬二千九百餘級奪  
營二十四四月疏奏海寇勢日熾結聯山賊互相  
應援臣標兵止二千五百所在告警不敷調用請  
增兵二千五百設五營統轄以資勦禦從之時賊  
黨尚衆出沒不常屢敗復至五月

上以廷相庸懦無才不能速殄逆寇有負簡用著解任二  
十五年



命管理船廠事務二十七年卒

石調聲

石調聲漢軍鑲黃旗人初任佐領順治十一年隨靖南將軍珠瑪喇征廣東破李定國兵于珊洲以功授雲騎尉遷叅領駐防福建尋調蘇州協領康熙四年撤蘇州駐防回京仍補叅領十年七月授杭州副都統十三年四月逆藩耿精忠叛時調聲同副都統沃申守江山縣為賊將馬九玉所陷退

保衢州康親王傑書檄守金華九月賊將陳重結  
土寇據金華之鄭店調聲同副都統瑪哈達副將  
陳世凱擊賊乘賊渡水夾擊之大獲燬賊巢二十  
餘十月凌霞渚奸民朱毛頭聚衆叛受偽職調聲  
同沃申擊散賊衆斬首千餘賊將葉鍾蔣魁陳遙  
等分據浦江義烏肆掠調聲同世凱及總兵李榮  
先後剿擒其黨凌汝經又同瑪哈達擊賊于朱磯  
頭斬賊將朱陳梅和尚擒獲無算十一月同台吉

察渾敗賊將申時尚趙大玉于竹園村擒其黨徐  
瑞十四年十一月擢浙江提督十五年五月賊犯  
定關守備方俊密獻城約賊三路來攻謀洩調聲  
擒斬之同水師提督常進功固守定關六月賊陷  
象山縣據石門西溪二嶺調聲進敗賊于缸窑追  
至黃墩分兵奪石門西溪復象山十月遣遊擊柳  
星沿海設伏破賊于太清澳斬偽官楊家益會康  
親王大兵已拔江山常山進攻福建精忠詣軍門

降調聲招撫沿海偽官張鴻翼林衡楊四等百餘人浙江平十七年五月海賊鄭錦遣其將劉國軒吳淑急犯海澄康親王疏令調聲選兵三千往援詔趣之未至而海澄陷康親王令調聲守惠安七月賊圍

同安副都統雅大力棄城走賊遂圍泉州調聲退兵興化惠安亦陷八月調聲同叅贊大臣副都統禪布援泉州由楓亭大路攻賊巢復惠安追敗賊于洛陽橋賊遁泉州圍解十一月同沃申攻江東

橋破賊寨賊敗走調聲因督修浮橋通漳泉路十  
八年五月劉國軒等復奪江東橋柳山寨斷我糧  
道將軍賚塔檄調聲等逆擊于太平寨敗之十一  
月賊復自鰲頭山窺江東橋調聲同福建提督楊  
捷迎擊賊遁十九年大軍復海澄賚塔令調聲同  
楊捷乘勢復廈門金門賊遁出大洋康親王班師  
調聲回浙江任二十一年追議調聲前失臨江山  
惠安未收官兵骸骨罪革提督及雲騎尉二十七

年卒

王繼文

王繼文漢軍鑲黃旗人由官學生考授宏文院編修順治十一年遷兵部督捕副理事官十二年考選御史巡按陝西初入境即叅布政使黃紀興屯道白士麟貪污不法

詔革職逮問十四年回京都察院考覈繼文任內共糾劾文武官四十餘員督開荒田七千頃有奇招徠流

移民五千八百餘察出虛冒錢糧七十七百餘兩  
寔心任事善政最多允為稱職得

旨照例陞用授戶部郎中十八年出為江西饒九南道康熙三年調浙江寧紹台道六年裁缺十三年以候補道隨左都御史多諾等往湖北荊州督大兵糧餉十月授雲南布政使隨軍進征二十年六月擢雲南巡撫經理新復地方八月疏言滇省迤東西相距遼遠向設守巡道八員康熙六年裁併今大兵雲

屯軍稽紫要請復設臨元道一員駐臨安兼轄潯江廣西廣南元江開化等府洱海道一員駐楚雄兼轄姚安武定景東等府下部議行十月

上以中甸要地遠在金沙江外並無專汛

命繼文同大將軍彰泰等酌撥綠旗官兵鎮守十一月雲

南平二十一年十一月疏言雲南省城東南舊有金汁等河從松華壩借水於盤龍江逕嵩明州流入昆明縣境繞城北而東而南過雲津土橋入昆明



池兩岸築堤高二三丈水流其中蜿蜒六十餘里有壩有閘有過水涵洞蓋以積水溉田城中數十萬頃皆藉此河之利上年大兵圍困逆孽週圍壕塹不得不毀以致水利阻塞灌溉不通田畝荒蕪居民失業昆明額賦莫可催征自克城至今臣多方招徠而流離之衆見此附郭膏腴咸成棄土未免趨趨不返臣愚以為河壩不脩殘黎勢難歸業荒田不墾額賦何徵已檄官勘估需工料銀萬餘

兩際此財用艱難何可輕用正項請於通省官員及各屬土司酌行捐助第新定之區人力拮据非有以鼓勵之恐難必其樂輸今捐納各例停止惟紀錄一款無礙名器懇

勅部酌議捐銀若干准予紀錄以此捐項修築河壩水利既通殘氓樂業糧賦可以復舊下部議如所請照廣東戰船例捐銀百兩紀錄一次二十五年左都御史陳廷敬疏劾繼文將滇省歷年捐納米五十

餘萬石草千萬餘束存留不發反支帑貴買至大  
兵盡撤後始將所存米草折給官俸驛遞銀兩照  
市價扣歸與採買原價前後懸殊顯係侵沒在先  
濛混入告

詔繼文回奏繼文奏滇省自二十一年春大兵凱旋三月  
中即照原議停止捐納是時駐防各兵需用米草  
尚多經理餉學士佛倫公議採買及奉文復開事  
例已在二十一年冬此後按季具題候部文撥放

即如二十年秋季報捐至二十三年四月方准支給  
支給無幾大兵即於十月盡撤是以多有存貯歷  
年收存冊籍具存至採買價值因滇省盡屬山箐  
不通舟楫人多歲歉則立昂歲豐食少則漸減全  
省軍民耳目可質難以朦隱折給官役營驛之用  
不便照採買貴價致有虧累未免相懸但續奉開  
捐米草原以供給大兵臣止知謹守定例候部撥  
支不能變通預籌應請處分下部議以收支年月

相符且在

赦前免議十月丁母憂回旗二十八年復任雲南巡撫二十九年正月疏言雲南黑井鹽課當吳逆駐滇時家口部衆人多請加鹽額月增課銀二千兩今新經恢復民多流散戶口寥寥課額虧欠經臣于二十一年具題將歲增課銀二萬四千兩遵奉

諭旨暫除今部議復徵而逆屬家口盡行遣發投誠人員已經安插各省現今戶口所增無幾食鹽甚少請

將此項加增課銀照前豁免則井竈商民均安樂  
利十月疏言滇省屯田一畝之科幾納民田十倍  
之賦拖欠逃荒年甚一年臣自再蒞此土訪求民  
隱惟此屯田一項最為滇民苦累惟有將老荒重  
額田地減則貼墾尚有藉補虧懸今議見納軍糧  
人承墾者將屯田地上中二則六年後悉改為民  
田地下則起科屯田地下則十年後改為民田地  
下則起科其不係見納軍糧人承墾者六年後將

屯田地上中下則悉改為民田地上中下則起科  
仍令地方官量借牛種務使力耕有成至民間荒  
廢田地原主逃亡及不願開墾者不論何人承墾  
即為已業其上中二則倣豫省例六年後係中則  
者照下則納三年再歸中則係上則者照下則納  
五年再歸上則起科其下則田地請於六年後減  
半又三年再照本則起科三年內一應雜差均予  
豁免庶民累少甦民情思奮正額可充新賦亦可

少增三十年疏言滇省土知府知州等官向來遲誤表箋奏銷等案題叅者因不給俸祿無處分之例無由知徹嗣後如有罰俸降俸降職等事應比照流官定例按其品級計俸罰米每俸一兩罰米一石檄令移貯鄰近常平各倉以備荒賑三十三年以雲南省積錢壅滯疏請暫停鼓鑄諸疏均得旨先行九月擢雲貴總督三十七年三月魯魁山賊首擦捏等劫掠彙村弩傷新嵎營守備張廷柱繼文會



同臨元總兵王洪仁遣發流土官兵勦撫追斬賊首  
擦捏疏

聞下部議山林小賊例不敘功

特旨魯魁賊衆盤據有年官兵勦殺可嘉仍予議叙五月  
疏言魯魁一山與哀牢相接綿亘千餘里今賊首  
擦捏雖滅餘黨猶存新唱一營孤懸賊窟請設汛  
增兵彈壓要害查江內慢干壩乃新平縣境適中  
之地應撥千總一員帶兵二百名駐防江外增設

四汛舊哈跨果二處各增兵一百名大口增兵五十名袁牢山後之三家坡將元江協所管兵內抽調一百名撥把總一員防守仍歸該協管轄臨元鎮原設陽武壩一汛就近歸入新嵎營添設叅將一員原設守備改作中軍又野賊非往新元即奔楚景楚姚一鎮最為緊要查援勦兩協乃策應之師各撥千總一員各帶兵二百名一駐南安州界牌一駐景東府福都責令防守八月復疏言貴州

水西宣慰使安勝祖大為彝民之患今已病故請  
將土司停襲所屬地方改歸大定平遠黔西三州  
流官管轄均如所請是年冬入

覲以老病乞休

詔令原官致仕尋

命修理子牙河工

賜御書煙霞耆舊額四十年十月

特加兵部尚書銜四十二年五月卒

賜祭葬如例子用霖官山東布政使

范承勲

范承勲漢軍鑲黃旗人大學士文程第三子福建  
總督承謨弟由廕生入國子監讀書康熙三年授  
工部員外郎七年遷刑部郎中十二月充

大清會典纂修官十六年授江南道監察御史巡視  
西城疏請勒監生生員南籍冒北者歸籍從之十  
八年協理河南道事疏言定例降調官果清廉許

督撫題留懲勸兼用革職與降調同一罣誤而去  
留不同請嗣後革職官果清廉愛民者許一例題  
留督撫濫舉嚴定處分又言八法以貪為首貪吏  
僅罹薄譴何憚不為請嚴飭承審官執法訊追按  
律究擬毋徇庇塞責俱下部議行十九年閏八月  
奉

旨甄別滿洲漢軍科道不稱職者對品調用承勲議留  
特旨著去任改補吏部郎中九月川東賊譚洪叛據巫山

上命承勲同戶部郎中額爾赫圖馳赴彝陵趣將軍噶爾  
漢進兵十一月督湖廣進蜀糧餉二十年三月洪  
死其子天秘遁提督徐治都進剿以轉餉艱自萬

縣還駐夔州

諭承勲乘川峽未漲速運糧濟軍四月大軍進定雲南復  
命趣噶爾漢軍仍兼理糧務二十二年回任監崇文門稅  
務二十三年五月九卿詹事科道遵

旨舉清廣官承勲與馬八月擢內閣學士二十四年二月

授廣西巡撫

陛辭

上曰爾父兄皆曾宣力於國爾今為巡撫錢穀刑名雖係  
職任其最要者在潔已愛民若聽信幕客沽名妄作強  
不知以為知欺人欺已大為不可爾宜戒之八月奏免  
廣西容縣鬱林州追賠臨賊後無徵銀米十一月  
疏言廣西舊存倉米二十餘萬石前慮朽蠹議令  
全省暫折徵恐餘糧銷盡遇歉兵食不足請桂林

平樂二府徵半折半柳州府之賓州山險艱運永  
行折徵餘仍徵本色部議從之二十五年閏四月  
擢雲貴總督十二月疏言雲南舊有援勦兩協左  
駐尋甸右駐省城用供迤東策應請以右協移駐  
羅平州而以原駐羅平之廣羅協移駐廣西府與  
廣南營犄角既聯黔滇兼扼粵隘其左協分駐之  
曲尋鎮兵酌撥川黔要地防守議如所請二十六  
年六月疏裁貴州十五衛十所以偏橋衛併入施



東縣興隆衛併入黃平州移州治於衛治新添衛  
併入貴定縣移縣治於衛治安南所併入普定縣普  
安衛併入普安州安籠所併入安籠廳烏撒衛併  
入威寧府以貴州貴前二衛改設貴筑縣鎮西威  
清二衛赫聲威武二所改設清鎮縣平壩衛柔遠  
所改設安平縣安南衛改設安南縣敷勇衛修文  
濯靈息烽于襄四所改設修文縣永寧衛普市所  
改設永寧縣畢節赤水二衛改設畢節縣俱照所

請行十月劾提督萬正色婪賄侵餉

上命侍郎多奇富拉塔往鞫得寔論絞奉

旨萬正色從寬免死革提督任二十七年七月湖廣裁兵

譁變訛言四起承勲嚴禁密緝已而尋甸協兵於

是月十六夜脅衆譟變與營將格鬪潰走承勲擒

叛首任二等八名而省城營兵復謀于二十一日

倡亂承勲先期密擒叛首唐金等十三名寘之法

事

聞得

旨嘉獎八月疏言雲南產銅鉛先後設爐四十八鑄錢供軍餉向給全銀後因錢積以銀七錢三搭放每千文抵銀一兩鼓鑄日增錢價日減千錢值銀不三四錢又苦山險赴領艱運費請仍康熙二十一二年間例全給銀並停鼓鑄議准給銀減爐座之半二十八年正月番彝阿所殺土目魯姐及其母弟妹九人欲據其地有僕曰者克以魯姐妻瞿氏幼

子魯聚走免諸彞人扶為目阿所投匿東川結土  
婦安氏孫祿世豪掠錢匠村苦竹壩彞民牲畜犯  
姜州堡事

聞

上命兵部郎中溫保會同承勲等往東川檄安氏獻阿所  
至則諸彞與安氏擒阿所以獻斬之初雲南經兵  
革後屯賦錢糧自康熙二十一年至二十七年壓  
欠未完十二月承勲疏請分年帶徵奉

恩旨全行蠲免二十九年三月疏言雲南額徵米麥經前撫臣石琳題定夏稅米石仍徵本色康熙二十七年秋糧半本半折二十八九兩年全折三十年以後半本半折查各府州縣駐劄與分防兵多寡有無不同而存貯與額編之米亦長短廣隘各異今若以二十九三十兩年一概夏稅徵本秋糧全折半折是使有餘之倉得夏稅本色來秋半本而米愈盈不足之倉因今秋全折來秋半折而米愈絀計

莫若分別徵收使不需糧處變米為銀免滋朽蠹  
需糧處即取給本地不致病民病兵議從之先是  
提督馬三奇以貴州山路峻險撥運兵米脚費浮  
于正項奏請折給部議以有米兵少之處米價必賤有兵米少之處  
米價必貴殊難定例令承勲會撫提查議至是承勲奏言  
每歲折徵米二萬石若照有米處折給則價賤不  
敷兵丁轉買其苦在兵照米少處折給則價貴而  
徵輸必倍其苦又在民惟斟酌損益於秋成令各

府照時價估算本折均搭給兵自買從之三十一年三月奏改雲南永北協為永北鎮裁副將設總兵並設中左右三營遊擊各一其原設守備千把總等官改隸中營再設左右兩營守備各一千把總各六四月奏添大理府城守遊擊一守備一千總二把總四均

特旨俞允七月奏請裁洱海營經制兵千名并抽撥鶴麗鎮尋霑營兵各二百名歸永北鎮並裁洱海營叅

將守備等官議如所請三十二年十一月

上謁

孝陵承勲迎

覲米峪口

諭曰爾係盛京舊人爾父兄累朝効力爾兄又為國盡節  
朕因見爾思及爾兄心為慘切不見爾八九年矣爾鬚  
髮遂皓白如此今因郊外寒冷將朕貂帽貂褂白狐腋  
袍賜爾此時更換恐受風寒明日可服之來謝恩



賜御書世濟其美匾額三十三年三月內遷都察院左都御史六月江南江西總督傅臘塔卒

上諭曰兩江地方關係緊要范承勲行事堅定為人平易著補授江南江西總督十一月奏移江南鳳陽關監督駐正陽關三十四年二月疏言江西有漕糧四十八州縣除南昌新建二縣外餘皆地處山僻湏小船載米至省交兌糧艘向係民貼腳價官為解運嗣因州縣恐涉私派將此載入賦役全書康熙

二十六年經漕臣題叅各省並無支給腳價以違  
例照數扣追今十載無一報完者若官賠則已數  
更民賠又原係民貼豈可再令賠補若將腳價停  
給則僻處州縣之漕更慮遲誤請免追賠以後仍  
聽支給部議不准得

旨如承勲所請三月疏言江南下溼倉谷易腐請將江蘇  
安徽等州縣捐積倉谷於每歲青黃不接時以七  
分貯倉備賑三分平糶秋收以糶銀買穀還倉通

年出陳易新又言江南財賦甲天下州縣催徵不  
易舊例接徵接催官照原叅分數處分請嗣後計  
續完多寡為輕重如原叅欠二分今已徵完一分  
即改照未完一分例議處原叅欠一分今已徵完  
七八釐即改照未完不及一分例議處又言江  
寧駐防滿漢官兵歲需糧十六萬四千餘石於南  
屯米內撥解不敷照時價折給但各屬徵解南米  
在秋收後而月糧自正月起支急之則民苦預輸

緩之則兵虞乏食至改折之銀亦須二月開徵俟  
解到採買已在四五月間而正二月糧無措請將  
安徽所屬捐積倉米提解十六萬石充江寧現年  
兵餉其秋徵南米留作下年之用自此得先徵後  
給遞年相因庶無應接不敷之患更請將捐積倉米  
提十萬石存貯省倉值米貴時減價發糶又言江  
蘇額徵銀米歲三百餘萬今各年未完多者二十  
餘萬少者十萬有奇按額計算每歲所完已在九

分以上逋欠多係貧瘠下戶再漕項錢糧自康熙  
十八年後積欠甚多新舊同徵民力難應請將蘇  
屬州縣及安屬六安壽州合肥靈璧虹縣積欠地  
丁漕糧分年帶徵以紓民力諸疏均下部議行三  
十五年六月疏言官兵遇閏添支之糧江寧駐防  
於上下兩江協解京口八旗二營并水師三營於  
鎮屬漕糧截留不敷者照例折給查江安蘇松兩  
道漕項現有減存米足敷支給可免採買截留之煩議

從之七月請以省倉米十萬石賑淮揚徐災民復  
請借京口留漕鳳倉存麥接賑俱得

旨允行三十八年十一月授兵部尚書三十九年三月

命同工部尚書王鴻緒監修高家堰堤工尋以與河道總  
督張鵬翔議不協撤回四十三年四月以老乞休  
允之十二月河工告成加太子太保晉五級五十  
三年二月卒遺疏入

上曰范承勳効力年久敬慎自持勤勞素著予告以來尚

期優游頤養以副眷懷忽聞病逝朕心深為軫惻

予祭葬如例子時繹累官至工部尚書

閻興邦

閻興邦漢軍鑲黃旗人康熙五年由舉人授廣西  
馬平知縣丁憂九年補直隸新城知縣十年遷通  
州知州十六年入為工部員外郎二十一年遷御  
史洊遷鴻臚光祿寺卿二十七年五月遷順天府  
尹六月擢河南巡撫二十九年八月疏言豫省本

年漕糧部議定徵本色數月來開歸彰衛懷河六府並汝州各屬雨澤愆期二麥薄收秋穀鮮獲民赴隣郡購買米價騰貴往返盤費幾倍正供若使旱後未甦之民與各處歉收之地依期轉運不惟力有不能亦勢所難辦請俟三十年徵解以紓民力次年又以旱蝗請再停運俟三十一年仍徵本色均下部議行三十年二月疏報二十九年分墾荒田六萬四千餘頃下所司知之初總河王新命



議引小丹河濟運

詔下河南撫臣議至是興邦奏丹河發源晉省入沁合黃  
並無大小之名因河東西百姓開渠引水灌田澆  
竹小渠外復開大渠由河內武陟修武獲嘉等縣  
直達衛河歸臨清濟漕始有小丹河之名河臣請  
於三月用竹絡裝石橫塞各渠口洩細流以溉田  
餘水盡歸小丹河濟運誠恐亢旱之年渠深田高  
焉能灌漑欲灌田則誤運欲濟運則誤田查現今

重運俱由中河北上較昔甚早如雨水勻足即照  
河臣所議如遇亢旱請於每年三月初一日起至  
五月十五日止令三日放水濟漕一日下板塞口  
灌田周而復始五月望後漕艘過完聽民灌溉庶  
田漕並濟下部議從之三十二年十二月調貴州  
巡撫三十二年三月疏言各省常平倉貯捐納米  
石部議糶米易穀黔省自康熙二十八年冬至三  
十一年年終止共收過官員生俊捐貯米穀各五

萬餘石民少苗多商販寥寥一時未能盡數出易  
應就現糶米買穀還倉餘俟次年再糶二三年間  
米皆易穀不致紅腐備荒有賴從之四月疏言黔  
省康熙三十一年編審人丁部駁查明加增黔地  
編小苗仲什居六七向不編徵漢民更多寄寓並  
無恒產去來靡定難編入籍黔省賦役舊止徵一  
萬六千六百七十餘丁今已增多四千二百有奇  
若再編增恐不肖之員奉行不善將未成丁及老

廢亡故寄寓者一槩編入徵銀苦累小民乞俟下  
屆清編時提督陳奇舉出提督衙門安順等府官  
莊歲收料穀一千三百餘石歸入編審丈得熟田  
一千五百餘畝照例編徵銀米部以不符原數下  
興邦覆勘興邦疏言提督官莊向因叛逆提督李  
本深占據收租牧馬有與民均分者有給牛種而  
全收其租者亦有十收其六七者悉屬苛斂黔地  
恢復後民以提莊得免差役勉強供輸歷任提督

相沿未改今若求符原數勢必另立科則田少糧多民苗不堪苦累乞照所文編按民田一例征輸均奉

特旨允行三十四年二月奏黔南人文繁盛請依廣西鄉試解額取中三十名又疏言黔省蕞爾會城附郭新貴貴筑二縣雖各有職掌至如編甲捕盜通行案緝等件奉文轉發不得不兩縣互行一事而受兩番約束民多未使每以勢逼權分推委貽悞請

裁新貴縣併入貴筑縣再黔處萬山中名為一站  
險實千盤各屬途隔二三日或三四日不等一遇  
缺員附近州縣在衝衢者既難舍已從人其偏僻  
之區深箐窮谷苗蠻出沒刻難乏員又虞鞭長莫  
及請於貴陽首府添設通判一員差委可以迅行  
署缺亦無憂蕪碩寔於吏治有裨均下部議行三  
十七年正月卒於官

賜祭葬如例

祖良璧

祖良璧漢軍鑲黃旗人父澤洪官吏部侍郎以軍功授三等子遞加至一等子爵康熙九年良璧繼其兄良棟襲世職十九年授叅領兼佐領二十九年從裕親王福全征噶爾丹謀賊伏烏闌布通阻阿據林阜結駝陣自障良璧隨左翼兵由山腰奮擊大敗賊衆覆其巢三十年擢西安副都統三十五年二月撫遠大將軍費揚古由西路勦噶爾丹

良壁請從軍

上以西路軍糧屯翁吉

命偕副都統席爾哈達留兵督運六月由巴罕厄里根赴  
納喇特遇風雨牲畜道斃不能前以狀

聞時噶爾丹已為費揚古所敗携其從子丹濟拉由昭莫  
多西遁

上慮其劫翁吉糧

詔良壁速歸翁吉以所運米支給運丁餘悉焚之良壁得



旨馳還九月將護糧赴寧夏丹濟拉果率賊數千伏翁吉  
山谷中偵我軍半度哭出良壁魔殿後兵力戰前  
軍還擊賊大敗逐北二十餘里

上方聞丹濟拉驟至慮良壁勢孤及秦捷

優詔嘉獎四十二年十一月

上西巡閱西安兵

諭大學士馬齊曰滿洲兵丁整肅俱係將軍副都統訓練  
所致著各加一級十二月調正藍旗漢軍副都統四十

四年

上追念良璧翁吉破賊功且人材亦優擢福州將軍

賜孔雀翎及蟒服鞍馬四十六年

上南巡良璧至清江浦迎

駕

御書兵民協輯額及四時常喜戈船靜千里須教壁壘新

聯

賜之並衣一襲四十九年三月疏言康熙二十二年撥耿

精忠藩下兵一千歸上三旗因閩省無正黃旗駐  
防將應歸正黃旗人改撥正藍鑲白二旗查駐防驍  
騎校等缺出各旗藩下人皆得揀補惟此項因係改  
撥從未咨放其中不無弓馬可觀之人登進無階  
情殊可憫請嗣後正藍鑲白旗缺出將改撥兵丁  
一體拔補部議從之八月以泉州漳州等處旱歉  
奏

命侍郎塔進泰李旭升會同江浙兩省督撫截留本年鎮

江漕米十萬石運至狼山松江湖州漕米各十萬  
石運至乍浦令福建督撫等以戰船轉運賑災會  
總督梁鼎芬憂

特旨以良璧署理五十二年至京恭慶

萬壽

賜冠服尋

遣還任五十七年卒改世職為一等男兼一雲騎尉子應

樞襲

興永朝

興永朝漢軍鑲黃旗人初由筆帖式授吏部主事遷本部員外郎康熙十三年逆藩吳三桂反

上命刑部尚書莫洛經畧陝西莫洛察永朝有才攜以行嗣奏興安距漢中遼遠請復設關南守道駐劄以資彈壓即以永朝補授

詔允所請十四年興安遊擊王可成叛永朝偕總兵黨塞出走西安事

聞下部議黨塞不能安輯士卒應解總兵官以副將用永  
朝免議仍以道員用二十一年補廣西蒼梧鹽法  
道二十六年遷四川按察使明年擢偏沅巡撫二  
十八年三月疏言湖南額田二十八萬餘頃徵地  
丁銀一百二十四萬有奇今熟田十七萬餘頃徵  
銀七十二萬有奇較原額不及十之六蓋自明季  
兵火荒熟混淆豪黠者隱田漏課愚懦者業失糧  
懸以致訐訟日繁色賠滋累今計非丈量不能清

釐其法惟見田量田不遺尺寸熟者定為實徵荒  
者漸俟招墾糧隨田辦丁照糧編更以弓口田形  
造魚鱗細冊存之公府藉為左券屬吏行私剥民  
臣必糾之奉公守法臣必舉之至豪強侵隱多年  
當寬其既往許自首免罪又其事繁而且瑣勢必  
逾年完結難拘常限衛所屯田原與民地相錯應  
同時舉文以杜閃爍疏入

敕部議行並

諭丈地各官實心任事勿藉端科派有滋擾者照貪官治罪五月遷閩浙總督六月疏言湖南有三事未竟一清丈荒熟地畝方舉行也清丈之事行之善利國十居四利民十居六不善有司不難抑勒聚斂以病民恐臣赴閩後官吏泄玩舞弊後之人必將以開端咎臣一城下避風河不及興浚也長沙城西濱湘江中多暗石舟舶猝遇風濤觸裂覆溺近擬於江岸掘口遶城北挖土成渠直接城東蓄水廢塘



引入江水此渠一成所全實多且挑浚之地離城  
不遠亦可恃作金湯臣與僚屬措費鳩工而今忽  
中止深為可惜一月課諸生之規恐有偏廢也湖  
南文風不振士習多乖臣通行各學月舉一課供  
其格卷食饌以守令為主長沙臣自主之數月  
以來諸生既以誦習為功武斷把持之事亦覺漸  
減儻從此一暴十寒依然往昔所為中懷多疚者  
也伏祈

天語告誡逐一遵行期收實効下所司知之三十一年調  
漕運總督三十二年七月疏言淮揚鳳廬等屬地  
處大江以北所藝禾種或紅或白各就土宜每有  
硤瘠之區雨暘不若種本純而忽變雜或遇歉歲  
缺種春種之際得種即下不辨色類歷任漕臣帥  
顏保慕天顏並准紅白兼收自康熙三十年漕臣  
董訥請永著為例部臣恐有不肖之徒借此攬和  
議駁臣思漕糧止期乾圓潔淨原不拘於種色今

歲根苗即是去年籽粒必欲分析於磨礮簸揚之  
後殊多未便請不論紅白一體兼收部議不准行  
特旨俞允先是松江白糧旗丁掛欠米石部議嚴追懲究  
並請

敕漕督詳議經久杜弊之法八月永朝上言從前欠糧旗  
丁止議草運未嘗另立嚴條奸頑蔑視無忌請嗣  
後白糧船運回之日如有掛欠除草運追賠外仍  
做監守自盜律治罪從之三十二年二月調鑲黃

旗漢軍副都統閏五月因病罷尋以迎

駕失儀革職賞給藍翎侍衛三十五年從征噶爾丹

命署副都統在火器營行走三十六年授鑲白旗漢軍副

都統四十年正月自陳老病乞解職得

旨與永朝前任督撫初無裨益兵民之事乃稱硜硜自守

不合著解退副都統五月卒年七十

高其位

高其位漢軍鑲黃旗人父天爵已有傳其位初隸

鑲白旗由筆帖式管佐領康熙十三年逆藩吳三桂陷湖南順承郡王勒爾錦統師討之其位隨征署叅領駐防襄陽時叛鎮楊來嘉王會等頻掠鄖西穀城南漳等縣其位嘗率二十騎往偵遇賊土地嶺知將犯南漳馳越賊隊中創不退直入南漳城告守者為備賊逼城三日不能陷而遁十五年正月叛鎮譚洪引賊三萬水陸合犯鄖陽其位率百人扼之楊谿舖據崖射賊相持七十餘日糧盡

煮馬羈以食及副都統李林隆率兵來援乃擊潰賊衆十九年追論賊犯穀城南漳禦戰失利諸將罪革其位職任二十七年授火器營操練尉二十八年襲二等輕車都尉初其位弟其仕襲其祖尚義所遺世職至是其仕卒以其位襲二十九年七月隨大將軍裕親王福全征噶爾丹擊之烏蘭布通破其駱駝營三十三年擢叅領三十五年從上征噶爾丹凱旋加一級復管佐領三十九年四月授甘

肅永昌副將四十七年正月遷湖廣襄陽總兵五十二年四月擢湖廣提督

賜孔雀翎橐鞬鞍馬五十六年九月自陳乞罷

諭嘉其和輯兵民聲名素優令供職如舊六十年六月調江南提督六十一年七月兩江總督常蘊病劇以印齋巡撫吳存禮暫管

上特命其位署理十二月受代赴京雍正元年二月

命仍回提督任四月奏請保護

聖躬得

旨此奏字句之外實有一片愛君之心發乎至誠非泛泛  
虛文可比二年三月奏言松江之泖湖澱湖澄湖港汊  
叢雜江浙錯壤與太湖毘連經兩省督撫與臣委  
官勘議防奸法計松江所屬通船要口一百十三  
處釘椿立柵以時啟閉官捐工料百姓樂趨事將  
次告成

諭以權宜措施必無礙商民乃善七月



賜詩有裨益軍民資偉畧劑調文武在和衷之句十月奏  
進黃浦漁船所網得雙變龍紐未刻玉印

諭曰此事若出自他人非卿奏聞朕不信也卿乃忠信老  
成封疆大臣斷不至有捏造虛誕之舉以阿諛取容今  
賜卿數物以示嘉悅三年五月

諭廷臣曰提督高其位前署總督印務時年羹堯奏其年  
老衰憊兩耳重聽貪位隱飾貽誤地方不應畀以重任  
是以

聖祖仁皇帝降旨罷其署理及朕即位猶記年羹堯之言  
特召高其位來京陛見朕視其為人老成忠厚善氣迎  
人雖已年老精力猶可任用適值年羹堯在京遂令伊  
詢問高其位觀汝筋力尚可為朕効力數年不得固辭  
目下現有鑾儀使一缺旗下都統一缺著量其力之所  
能自行陳奏彼時高其位奏都統事務向來不甚熟練  
鑾儀衛又無可効力之處朕遂降旨令回松江此乃出  
自朕意加恩老臣並非年羹堯贊助之力在年羹堯必

隱其從前之叅劾反市德于高其位而高其位不知亦  
以為出于年羹堯贊助之力也去年高其位奏進松江  
漁船所獲玉寶朕賞以四團龍補服等物又適值年羹  
堯在京必又向高其位居功冀其感激聞年羹堯將一  
無賴小人薦與高其位高其位即授以把總未幾又特  
拔為千總此事在曷時督撫提鎮中皆所不免年羹堯  
尤視為常事但高其位曷被年羹堯叅劾及朕加種種  
之恩皆特出朕意與年羹堯毫無干涉而年羹堯竊君

恩為已功高其位奉私囑如公令即此見年羹堯之巧  
詐營私隨處要結而內外臣工之為所愚者不少矣九  
月授文淵閣大學士兼禮部尚書加太子少傅其  
位以衰老不勝機務奏辭

詔俟受代後即來京供職四年五月至京改隸鑲黃旗尋  
乞休

諭以跪拜艱難高年常有之事不必遽行求退十月以八  
十生辰

賜扁聯及服食等物銀千兩十一月復乞休得

旨卿宣力年久恪慎奉職老成練達茂著賢聲是以簡預  
機務用昭優眷前以老病乞休朕未忍俞允特命供職  
數時以示眷念耆舊大臣之至意今復行奏請情詞懇  
切准以原官致仕五年正月卒

命王大臣侍衛奠茶酒

賜祭葬如例謚文恪十二年十月入祠賢良祠原襲之二  
等輕車都尉循例改騎都尉以其次子纘勲襲長

子起由廕生授四川茂州知州累官至兵部尚書  
雍正十三年罷尚書任以都統銜在

雍和宮行走尋獲罪革職逮問乾隆元年

命發往軍臺効力贖罪七年回旗十三年卒

年遐齡

子希堯

年遐齡漢軍鑲黃旗人由筆帖式授兵部主事累  
遷刑部郎中康熙二十二年授河南道御史巡視  
中城尋遷內閣侍讀學士二十七年遷宗人府府

丞二十九年晉內閣學士三十年授工部右侍郎  
三十一年二月轉左十月授湖廣巡撫三十八年  
奏言湖北武昌漢陽黃州安陸德安荊州襄陽等  
七府應徵匠役班價等銀千餘兩自明季迄今年  
代久遠子孫遷徙亡絕闕額無徵有司或代為捐  
解或派累小民官民交困查江浙二省因匠班無  
徵歸地丁帶徵湖北事同一例請自康熙三十九  
年為始亦歸地丁徵收每畝加增絲毫而賦無關

額官民俱免賠累部議從之四十年二月給事中  
馬士芳劾遐齡徇庇老病廢弛之布政司任風厚  
不入大計

詔令明白回奏風厚來京引見嗣遐齡奏風厚辦事老成  
並無遺誤風厚抵京引

見

諭曰任風厚尚未衰老可以辦事著仍赴原任馬士芳叅  
奏不實以言官免其議處七月遐齡疏叅黃梅縣知縣



李錦虧空地丁銀三千餘兩請革職究追從之尋  
黃梅縣民會集萬人閉城留錦不容去任

命總督郭琇嚴審速奏八月琇奏言黃梅縣未解銀三千  
餘兩實係民欠隨于七月徵完知縣李錦並無虧  
空百姓因錦平日清廉聞其解任一時圍聚生員  
吳士光等許為糾人赴省保留久始解散亦無違  
抗情形請令錦仍留原任士光等革去衣頂應請  
復還得

旨凡官員去留之權豈可令百姓干預聚衆肆行之風亦漸不可長該督撫庸懦無能平時不能約束軍民及至事出專務遮飾苟且議結殊屬不合李錦居官雖優不可仍留黃梅之任著令來京於直隸附近補用吳士光等著解部發往奉天郭琇年遐齡俱降一級留任四十年遐齡以疾乞休

允之雍正元年以次子羹堯平西藏功加尚書銜二年復以羹堯平青海功加太傅一等公

賜雙眼孔雀翎三年羹堯獲罪遐齡及長子希堯俱應緣

坐

諭曰年羹堯剛愎殘逆之性朕所素知其父兄之教不但素不聽從向來視如草芥年遐齡年希堯皆忠厚安分之人著革職免罪五年遐齡卒

特恩還原職致祭一次希堯由筆帖式補授雲南景東府同知康熙四十五年遷直隸廣平府知府五十年遷大名道五十二年晉廣東按察使五十五年晉

安徽布政使五十九年潁州知州王承勲訐告希堯需索規禮徇庇鳳陽府知府蔣國正將虧空捏民欠冒蠲侵蝕等款經總督常鼎恭奏

命左都御史田從典等往鞫俱無証據失察國正冒蠲希堯應革職從之六十一年以布政使銜署廣東巡撫雍正元年實授疏報欽州澄海南海東莞等二十九州縣衛所開墾六十一年分田地一百四十二頃下部知之三年七月擢工部右侍郎十一月

因弟羹堯獲罪革職四年正月授內務府總管七月

命管理淮關稅務十二年加都察院左都御史銜十三年  
江蘇巡撫高其倬疏奏希堯庇惡縱貪鞠實削職  
乾隆三年卒

欽定八旗通志卷一百九十一

欽定四庫全書

欽定八旗通志卷一百九十二

人物志七十二

大臣傳五十八

漢軍鑲黃旗四  
綸

范時崇  
施世  
楊長春  
高其倬

郝玉麟

范時捷

范時崇

范時崇漢軍鑲黃旗人大學士文程孫福建總督承謨子也承謨殉耿逆之難時崇以廕入監讀書

康熙二十三年授遼陽州知州二十八年遷廣西  
梧州府同知二十九年調南寧府同知三十一年  
遷直隸順德府知府三十三年調宣化府知府三  
十六年遷天津道四十年擢貴州按察使尋調福  
建按察使四十三年遷山東布政使四十四年擢  
廣東巡撫四十五年七月疏言高州府吳川縣屬  
硇川一島原有田糧戶口載在版籍自康熙元年  
遷界戶遷田廢丁糧豁免無徵二十三年展界又



因孤懸海外仍未給民耕種近奉

旨酌改沿海營制硃川島已設專汛遷民來歸故土已有  
譚福臻等九十餘家呈請復業應查明原額錢糧  
戶口聽開墾陞科下部議行十月

上以兩廣額定鹽稅外各處餘費多於額稅以致歲歛正  
項錢糧

命時崇會同巡鹽御史圖爾泰兼理鹽政

上發函章

諭以兩廣鹽政積弊甚多朕已察得陋弊數條著交該撫查辦十二月時崇遵所

發章內情節疏奏鹽政七條一鹽政衙門歲有羨餘十萬兩向歸鹽政有一種蠹胥名曰發收鹽政初任時任其播弄迨少知事例而一年差期將屆急公之心不勝營私之念徵羨餘而置正課於不問應將此項盡充公用其發收一役應革一鹽政到任即遣內司承差坐守場口名為緝私止知勒索致私

鹽充斥查緝私責在文武官原無藉內司承差應革一恤商裕課無過於裁冗員運司職掌兩省餉課應與庫官仍留任任事其知事大使及潮州廣濟橋運同廣惠分司均屬冗員應裁查驗之任責之州府課銀徑解運司一運司向得羨餘六萬兩內應解河工銀萬兩銅斤水脚銀萬兩今鹽政羨餘充公其鹽政名下銅斤水脚萬兩應在運司羨餘項下支解餘三萬兩充公一行鹽地方文武員

皆有規例名曰茶果應行禁革再犯以枉法贓治罪一兩廣場商無力養竈丁不得不售私鹽埠商不能向場買運民間又不得不食私鹽商人惟買鹽政大票以為行鹽護符私鹽盛則官鹽愈滯請將運使庫銀借給三萬兩每府委佐貳賢員將竈丁所曬鹽盡行收買鹽價收放責成知府隨賣隨收官鹽得行課餉自裕一兩廣鹽埠惟運樂與廣濟橋最大利徒捏商人名色賄鹽政承充總商倚

勢恣私必應禁革令各州縣自募殷實土著具結  
保充疏入部議如所請鹽政運司所得羨餘解交  
內務府得

旨廣東兵餉不敷此項銀兩即存留彼處充餉餘如所議  
行四十七年三月疏言粵東濱海各州縣倉穀久貯易  
於霉爛省城八旗官兵需糧甚多請將近省州縣  
存穀酌量多寡折米六萬石運省支用其該年派  
撥額米秋成徵補間遇歲歉亦可動用賑濟下部

議行十二月疏言前耿逆之變隨臣父范承謨殉  
難者五十三人內生員嵇永仁王龍光儒士沈天  
成及臣族叔范承譜俱偕臣父幽囚三載殉難死  
節經前撫臣楊熙題請

贈銜部以生員無追贈例議寢臣仰祈

皇上特沛恩綸予以一命陪祀臣父祠堂以慰忠魂下部  
議生員嵇永仁王龍光應追贈國子監助教沈天  
成范承譜雖庶民無追贈例但係死節應追贈國

子監學正并入祠陪祀從之四十八年五月疏言  
廣東連州總鹽額引行銷本州及湖廣之桂陽臨  
武藍山嘉禾四州縣樂昌總鹽額引行銷本縣及  
湖廣之郴州宜章興寧永興四州縣但連樂二州  
縣之引多於衡郴八州縣之額以致此壅彼缺請  
量勻十分連州樂昌行銷十分之三桂陽郴州等  
行銷十分之七又潮州惠州贛州三府俱行銷廣  
濟橋鹽此三府所屬平遠鎮平程鄉興寧長樂五

縣額引較多而惠州府屬之龍川和平永安三縣  
及江西贛州府屬十二縣額引獨少不敷民食應  
將平遠等五縣之引勻銷於龍川等十五縣贛屬  
十二縣內信豐龍南定南三縣接壤惠川距潮路  
遠難運應就近改食惠鹽又福建汀州府屬八縣  
內長汀一縣額引幾居通府之半應撥銷於寧化  
等七縣廣西靈川陽朔義寧三縣鹽引難銷應撥  
於易銷之全州灌陽興安三州縣商民均有裨益



部議從之四十九年八月擢福建浙江總督時海賊鄭盡心在洋肆劫遠至錦州等處兵部檄沿海各省嚴緝五十年三月時崇緝獲盡心解京四月疏言兵糧計口授食刻不容緩本年夏秋不敷兵米萬七千七十餘石請於嘉湖二縣府捐米石內各移萬石貯省倉以敷兵米下部議行五十二年五月疏言臺灣屬三縣年徵稻粟十三萬八千餘石除折支各營兵米外歲餘七萬石現存六十六

萬三千餘石貯已十年易致紅朽請將新收者勻  
留二十萬石備三年兵米之用其四十六萬餘石  
出糶給臺灣俸餉從之八月又言閩省福興全漳  
四府一年兩熟本年興漳早禾豐收福州歉薄晚  
稻則興全兩未霑足福州得雨更遲恐來歲青黃  
不接時民食可慮請于江浙運米內撥給收貯米  
貴平糶得

昔江南運米內速將五萬石運至福建米到日即行平糶

母致浥爛五十三年三月

陞見瀕行

賜御製詩有棟梁祖幹家聲重蘭桂孫枝令譽清之句

序云浙閩總督范時崇陞見來京朕每念伊祖為開創宰  
輔伊父乃忠義名臣所以待之優重今因回任特書御  
詩餞送五十四年十一月授左都御史五十五年五月  
因祈雨不親到經大學士嵩祝奏劾得

旨范時崇著降三級留任革去恩詔所得廕生五十六年

四月授兵部尚書五十八年九月振武將軍博爾  
丹請於莫代察罕廋爾與鄂爾齋圖果爾各築設  
站

特命時崇前往料理五十九年三月回京十月以疾乞休  
允之十二月卒

施世綸

施世綸漢軍鑲黃旗人靖海侯琅仲子康熙二十  
四年以廕授江南泰州知州二十八年正月以承

修京口沙船遲誤部議降調督臣傅臘塔以世綸清廉公直題留得

旨留任三月擢揚州知府三十年八月海潮驟漲泰州范公堤衝塌千九百餘丈民田竈地多沒世綸牒請捐修三十二年調江寧知府三十五年丁父憂督臣范承勲以世綸輿情愛戴請在任守制御史胡德邁特疏應行離任遂歸連丁母憂歲餘

特旨授蘇州知府仍以終制辭不赴三十八年服闋授江

南淮徐道四十年十月湖南按察使員缺大學士  
伊桑阿等以九卿保舉世綸入奏

諭曰施世綸朕深知之其操守果廉但遇事偏執百姓與  
生員訟彼必護庇百姓生員與縉紳訟彼必護庇生員  
夫處事惟求得中豈可偏私如施世綸者委以錢穀之  
事則相宜耳十二月遷湖南布政使先是議遷五開衛  
署於平屯俾黎平府專城而治四十一年世綸牒  
稱五開衛界黔粵控蠻彝實為辰沅靖之藩籬明

宣德年間黔省黎平府數被苗患爰僦衛城建府署

國朝因之自康熙二十七年府衛官弁不和始有遷衛之議平屯僻處一隅不惟建造無資且孤立堪虞若官軍兩遷一旦棄田園壞廬舍必致流離失所若僅遷衛署貢賦出納遙轄最難矧自明迄今府衛同城軍民相安無事請仍舊便議久不決嗣總督喻成龍巡撫趙申喬會疏以

聞

特旨俞允四十二年以衡州府之安仁嘉禾臨武永州府之江華寶慶府之城步及郴州之桂陽靖州之通道天柱向止訓導一員請添設教諭又永定銅鼓二衛止設教授綏寧會同二邑止設教諭俱請添訓導

勅部議行四十三年調安徽布政使四十四年遷太僕寺卿四十五年二月因湖南任內失察兵掠當舖事



罷職三月

特旨授順天府尹疏陳四款一禁五城司坊擅理詞訟一  
禁奸徒包攬捐納一禁牙行要佔客貨一禁逐流  
娼歌宴

勅部議定為令四十八年授左副都御史兼管府尹事四  
十九年遷戶部右侍郎督理錢法尋調總督倉場  
五十四年奉

旨巡撫雲南會漕運總督缺員即以世綸補授先是漕運

俱由瓜州開行其閘下花園港乃糧艘停泊處至是江溜北趨花園港衝塌百餘丈世綸以咨河臣恐糧艘遲滯權將繞城河開壩行五十九年七月

上諭曰總漕施世綸居官素優歷年漕船俱催趲全完並無遲悞本年漕船已經過淮更無他事漕運印務暫交與河道總督趙世顯署理施世綸速赴豫省將河南府至西安黃河輓運路逕勘明具奏陝西現在穀石數目亦著查奏今陝西正值軍興之際施世綸暫居陝西協

同總督鄂海辦理世綸乃溯流上尋求古蹟九月疏言  
河南府孟津縣至陝州太陽渡大小數十餘灘緯  
路高低不等或在河南或在河北惟圯把窩魚林  
漆等處緯路年久間有坍卸其澗池以下水道下  
水船可載糧三百餘石上水載及其半澗池以上  
河高迅激僅可輓數十石由砥柱至三門神門本  
無緯路若小舟乘東南風猶或可上鬼門水勢洶  
湧土人從未行舟惟人門稍緩石崖鑿有緯路路

旁鑿有方眼又有石鼻臣愚以為石鼻可穿鐵索  
方眼可裝木限援手助力觀此則從前輓運跡猶  
存自陝州至西安府河水平穩俱有輓運路逕臣  
謹繪圖呈

覽又奏河南府至陝州三門現在無船請自河南府至陝  
州太陽渡三百餘里用車運計五日可到每車可  
裝穀八石計穀二十萬石需車價銀四萬三千七  
百五十兩自太陽渡至西安府黨家馬頭河平穩

水運為便需運費銀二萬六千兩自黨家馬頭至  
西安府倉二十里又需車價銀四千兩其貯穀口  
袋二十萬餘需價銀三萬兩共計銀十萬三千七  
百五十兩總於豫省支銷不令陝西接運但運穀  
二十萬石止得米十萬石請令豫省以二穀易一  
米起運則運價可省半若慮米難久貯請照例出  
陳易新奏入

嘉其詳悉從之十月

上諭曰陝西地方現有軍務又年歲歉收總漕施世綸協同總督鄂海動支倉穀散賑但地方官員大半在軍前辦事之人殊少發帑金五十萬並陝甘常平倉貯穀百三十餘萬石酌量動用派部院司官往賑交施世綸總管六十年四月疏言陝西四月無雨秋成可慮豫省先運米十萬石督臣已借支駐防兵餉所存無幾請促豫省將後運米石運到平糶再撥河南湖廣米各十萬石運至陝西存貯備用部議如所請六月

命歸淮安理漕事六十一年四月以病乞休

溫旨慰留令其子廷祥馳驛省視五月卒遺疏入請隨父

琅墓附葬閩省

上允之

諭曰施世綸簡任總漕清慎自持勤勞素著歷年催備無  
誤前病請解任方冀調理痊愈以副眷懷忽聞溘逝深  
為軫惻應得卹典察例具奏尋

賜祭葬如例

施世驃

施世驃漢軍鑲黃旗人靖海侯施琅第六子康熙二十二年隨琅勦海賊鄭克塽委署守備取澎湖及臺灣叙功加左都督銜三十年授山東濟南城守營叅將三十五年二月

上親征噶爾丹天津總兵岳昇飛奏薦世驃隨征

召試騎射

命護糧運既至奎素地復隨大將軍馬斯喀追賊至巴顏



烏蘭凱旋仍任濟南叅將乞歸福建葬父得

旨施琅久在海疆功績懋著其子施世驃頃隨軍進剿亦  
効有勤勞準給假葬親事畢即回任三十七年遷臨清  
副將四十年擢浙江定海總兵四十二年四月

上南巡

御書彰信敦禮匾

賜之時海中多盜世驃屢出洋巡緝先遣裨將假商船以  
餌盜擒獲甚衆斬盜首江崙四十六年

上南巡

詢及擒斬海盜事

溫諭嘉獎

賜戴孔雀翎四十七年擢廣東提督五十一年調福建水師提督六十年四月姦民朱一貴自稱明裔偽號中興王下大元帥聚衆倡亂於鳳山縣之姜園害臺灣總兵歐陽凱副將許雲叅將羅萬倉遊擊游崇功等遂陷臺灣府治五月丙寅世驃聞報即率

所部進扼澎湖總督滿保檄南澳總兵藍廷珍等  
以師會衆議三路進攻世驃謂南路打狗港在臺  
灣正南南風正盛不可泊北路之清風隙去府百  
餘里餼運頗艱度賊必屯聚中路宜直搗鹿耳門  
時臺灣文武官相率退回澎湖惟北路淡水營守  
備陳策堅守汎地世驃遣遊擊張賊等赴援而自  
統師指中路選勁卒乘兩小舟載旗幟先伏於南  
北港六月丙午抵鹿耳門外洋賊據礮臺拒阻世

驃登船樓督戰擊鼓發礮中賊貯火藥器火大熾  
賊驚潰衆軍齊進兩港悉樹我軍旗幟賊不敢犯  
遂揚帆直度鯤身鯤身者海沙也大舟不能過是  
日海水驟漲八尺戰艦乘風迅達遂復安平鎮明  
日破賊四千於二鯤身辛亥賊悉衆八千來犯復  
擊敗之壬子遣守備林亮等由西港進遊擊朱文  
謝希賢林秀等越七鯤身由鹽埕大井頭諸路奮  
勇登岸並趨府城世驃身先將士指麾布陣賊俱

敗潰一貴竄遁遂復府治復遣叅將林鎮等分路撫勦閏六月丙寅諸羅縣溝尾莊民楊旭等誘擒一貴及其黨翁飛虎王玉全張阿三李勇陳印等以迎叅將林秀縛送世驃軍前賊黨抗拒者先後擒斬畧盡餘衆就撫臺灣南北兩路悉平

上詔部臣優叙有功將士

賜世驃東珠帽黃帶四團龍補服九月世驃卒於臺灣軍營遺疏言臣父琅昔日蒙

恩葬閩今臣骸骨願得與父相依并留臣幼子隨臣妻守  
塋近因勦賊借藩庫銀一萬兩容臣長子雲南知  
府士岡次子廣東遊擊廷專變產交完疏入得

旨施世驃効力年久勞績懋著沿海水師營務極為諳練  
簡任提督實心盡職當臺灣匪類竊發即調遣官兵親  
渡海洋屢次大敗賊衆七日内克復臺灣擒獲賊首朱  
一貴等俾地方寧謐深為可嘉海疆要地正資料理忽  
聞將星隕落朕心深為悼念著贈太子少保察例賜卹

所借藩庫銀一萬兩免其償還其安葬福建及妻子留  
住之處並照所請行

賜祭葬如典禮諡勇果雍正元年八月兵部議敘克復臺  
灣功以應否給世職請得

旨臺灣地方自古未屬中國

皇考以聖畧神威取之載入版圖逆賊朱一貴等倡亂佔  
據臺地

皇考籌畫周詳指授地方官員遣調官兵七日之內勦滅

數萬賊衆克復全臺

皇考當春秋高邁威揚海外功德峻偉官兵感戴

皇考教養之恩奮勇攻取甚屬可嘉固不必援引前例後亦不得為例茲仰副

皇考從優議叙之旨官員現行議叙功加之外著概行各加一等提督施世驃統領大兵徑渡海洋鼓勵將士屢經大戰擊敗賊衆七日之內克復臺灣著給予一等輕車都尉世職尋以其子廷專襲



楊長春 弟長泰

楊長春漢軍鑲黃旗人父廷瑜任杭州駐防協領  
從征耿精忠於台州陣亡長春廕八品監生康熙  
二十五年授佐領三十五年由中路隨征噶爾丹  
管礮有軍功三十八年都統公鄂倫岱奏薦長春  
上親揀選以真隸遊擊補用四十一年授京口叅領四十四  
年

駕南巡長春以沙船備操

上追念其父陣亡

賜壯節流芳額四十九年鎮海將軍馬三奇奉

旨緝海賊鄭盡心黨與令長春帥兵船出洋搜捕長春由

吳淞出口歷內外洋及江南浙江接壤之盡山花

烏等處抵浙省定海於衢山舟山間獲賊船三賊

五十餘三奇以長春於陸路水路皆諳練奏請授

中軍副將

上允其請五十一年三奇保題長春引

見

親詢出洋緝賊情形得

旨嘉獎五十七年調湖廣鄖陽城守營副將五十九年遷

江西南瑞鎮總兵雍正元年

賜孔雀翎二年擢浙江提督

陞見

賜秉心誠悃額並冠服

命長春於浙省道府以下官舉所知者一員奏言臣到浙

未久整飭營伍文員內才幹廉潔者未盡周知不敢冒昧陳奏得

旨所奏合宜應如是時長春弟長泰任肅州總兵以長春授浙江提督具疏謝

上諭之曰汝兄楊長春德勝於才和平忠厚謹慎有餘所嫌者稍覺偏於善柔雖然武臣中可謂一好提督四年長春卒

賜祭葬如例諡勤恪長泰由營總於康熙二十九年從裕

親王福全征噶爾丹三十二年授佐領三十六年  
由中路隨征噶爾丹四十年授叅領五十年擢西  
安左翼副都統五十四年策妄阿喇布坦擾哈密  
長泰隨將軍富寧安駐防巴里坤五十六年襲擊  
策妄阿喇布坦賊衆於烏魯木齊多俘獲還仍駐  
巴里坤下部議叙五十七年遷肅州總兵雍正三  
年富寧安以策妄阿喇布坦已歸順奏撤巴里坤  
等處兵長泰率吐魯番撤回官兵赴肅州汛鎮守

六年授杭州副都統十年五月以老解任尋卒

高其倬

高其倬漢軍鑲黃旗人父廕爵任口北道其倬由康熙三十三年進士改庶吉士散館授檢討尋兼佐領四十一年充四川鄉試正考官四十五年授右中允尋轉左四十六年遷侍講四十八年提督山西學政五十一年丁父憂服闋補侍讀遷右庶子五十五年轉左五十六年二月遷侍讀學士十

一月遷內閣學士五十八年正月以河南南陽鎮  
標兵挾忿圍辱知府

命其倬同刑部尚書張廷樞往鞫得實寘首犯於法總兵  
高成等論罪如律二月丁母憂五十九年授廣西  
巡撫六十一年二月署雲貴總督十二月實授雍  
正元年九月疏言雲貴兩省土司承襲向有陋  
規上下衙門每因文結舛錯藉端需索苦累臣已  
嚴行禁革并請嗣後咨部文冊內數字舛錯無甚

關係者免其馭換於疏內代為聲明庶承襲事易  
結指索弊除得

旨嘉獎十二月疏言雲貴魯魁山土目楊方普李四姓糾  
衆剽掠不聽約束本年十月內其酋方景明等率  
猺夷數百殺元江猺目施和尚焚其寨臣遣兵分  
剿擒景明及猺夷三百二十六名分別正法

報聞先是青海台吉羅卜藏丹津肆逆謀侵西藏定西將  
軍策旺諾爾布檄各路偵禦其倖以雲南邊外



中甸阿墩子地方為進藏要路檄遊擊劉宗魁劉國侯等嚴防並遵

旨令提督郝玉麟以兵二千由中甸進駐察木多副將孫宏本以兵五百赴中甸為聲援二年二月羅卜藏丹津為大軍所敗竄準噶爾青海平中甸喇嘛營官番目等攜三千五百戶繳偽劄納土歸誠其倬疏

聞

上嘉其辦理妥協給騎都尉世職十月貴州狝家苗酋阿  
近與弟阿卧倚險作亂其倬以狝家苗聚處定番  
廣順二州境其附近苗寨多被迫脅遣人招撫阿  
近等勢窘為官兵所擒疏至

諭部優叙加三級尋請增雲南楚姚鎮兵六百并增鎮屬  
景蒙營叅將守備各一千總二把總四兵千即以  
新裁援勦左右兩協弁兵撥補部議從之十一月  
條奏中甸善後事宜一中甸開墾商民日增請設

撫番清餉同知及經歷巡檢等官管理一畚目舊  
有營官神翁列賓名目聽堪布喇嘛指使請給外  
委守備千把總劄付聽中甸文武官轄一中甸向  
行滇茶請照打箭爐例設引收課由麗江府收報  
一中甸沿江數百里及山谷曠土甚多請給牛種  
房屋招佃開墾三年後起科供增駐官兵歲糈一  
中甸僧衆千餘寺屋數百收藏軍械易於宿奸番  
人舊給喇嘛費甚多應裁減除出身西藏之喇嘛

外其本地喇嘛選誠實者三百名咨給度牒餘以  
次選補器械入官每年量給青稞酥油并銀三百  
兩為口糧衣單資至番目受外委劄付亦分別歲  
給銀兩青稞養贍又條奏魯魁山善後事宜一魯  
魁山內通哀牢外界異域須重兵控壓請設普威  
營置叅將一駐普洱守備二分駐威遠土州及茶  
山千總四把總八分汛控禦一賊巢全在元江協  
與新甯營所轄地新甯營隸臨元鎮不隸元江協

兩界互相推卸誤事請移新曹營及擬設之普威營均隸元江協以臨元鎮統轄一威遠土州為野賊逋逃藪請改土歸流設撫彝清餉同知及經歷井大使巡檢等官分管鹽井地方事務一方姓普姓土職糾衆滋擾請停襲一威遠新開之按板抱母二鹽井歲獲息銀二萬餘兩請充新兵餉一裸目施和尚之姪臚勒等妻子請移駐元江府城威遠土官刁光煥子弟家口移省城安置一九龍江

口夷人出入處請設汛照山海關例給印票客商  
兵役往來一例盤察毋得出境滋事村寨各編里  
甲戶口以稽一設義塾數處夷人子弟有志讀書  
者入塾誦習於元江府附考額外加取二名一勸  
誨夷人墾田請照雍正元年定例旱田十年水田  
六年後陞科又條奏貴州苗疆事宜一定番廣順  
頑苗皆就擒請於西猛設汛調定廣營千總駐防  
一定番廣順二州路通廣西泗城土府請於青藤

斷杉樹二處設汛衛行旅一請改大定鎮為協裁  
中營遊擊以左營兼中營仍守大定移中營守備  
一千把總各一分防廣順州所屬長寨遮貢安順  
府所屬十三枝普定縣所屬五枝等處移把總一  
防羊城壘統歸定廣協轄至都勻府屬之獨山州  
接廣西南丹土州苗性尤頑請移都勻守備駐防  
一點省境連川楚姦人勾結掠販人口為害請定  
例地方官一年內分別拏獲人數議叙其不能查

緝為他處獲者亦照人數議處客民有買貧民子女者報官用印不得至四五人違者照興販科斷一黔省與楚蜀滇粵接壤請定例夷人越界拏送本省滋事者即於其地審辦又黔省有拏白放黑之習被人劫殺力不能報將無干之家奪其人畜暗插冤單令其轉為報仇否則索贖請加應得罪一等一土司等貧困不支往往以有糧田詭稱無糧售於紳衿商民買主收無糧之租土司納無田



之賦久之完納無資或派令屬苗代完請徹底清查令執業者輸納又土司下設立權目人等報明有司後有事發併懲一點地潮濕倉米易朽請核計兵米存二年之蓄餘於春夏減糶著為例一黎平府與楚省五開衛同城民苗雜處分隸兩省請改五開衛為縣隸黎平銅鼓衛亦歸併五開古州八萬等苗疆均屬黔省事權歸一又言向來雲貴兩省拔補千總把總皆以本營之兵補本營之缺

伏思同為兵丁一旦難以約束即同輩千總亦羣  
非笑其不肖者則又護庇兵丁將備稽查不易為  
力請嗣後拔補本營時即於外營對調不必仍留  
本營

詔並如所請三年二月加兵部尚書銜五月疏言近聞策  
妄阿喇布坦萬里効順籌度經久之計正在此時  
臣以為兵宜酌減備未可全撤西路形勢臣所不  
知至阿爾台一路臣曾運米二次自殺虎口出經

蒙古各部落約三四千里大兵駐劄極邊甚有關  
係似宜兵數量減米數微增則遠戍倍加踴躍

上嘉納之六月晉太子少傅十月調福建浙江總督其倬  
以雲南鶴慶府鄧川嵩明騰越三州太和浪穹二  
縣土軍丁賦係明嘉靖萬歷間因夷人作亂暫撥  
民人協防隨立太和所鳳梧所名目每丁徵銀一  
兩伊等既納民賦於本籍又輸軍賦於防所相仍  
未革疏請豁除

久之四年抵閩浙總督任疏言福興漳泉汀五府地狹人稠自平定臺灣以來生齒日繁山林斥鹵之地悉成村落多無田可耕流為盜賊勢所不免臣再四思維惟廣開其謀生之路如開洋一途前經嚴禁但查富者為船主商人貧者為頭舵水手一船幾及百人其本身既不食本地米糧又得沾餘利歸養家屬若慮盜米出洋則外洋皆產米地慮透漏消息則今廣東船許到外國豈福建獨慮漏洩慮

私販船料則中國船小不足資彼之用以臣愚見  
開洋似於地方有益請弛其禁

詔下怡親王會同大學士九卿議行五年四月疏言臺灣  
水沙連等社兇番自朱一貴作亂後不納餉賦肆  
行焚劫臣令臺廈道吳昌祚同知王沂叅將何勉  
等率弁兵番壯分路裹糧進剿擒首惡骨宗等二  
十名各社相繼歸誠

報聞十月以李衛為浙江總督

命其倬專管福建總督事六年二月條奏福建鹽政事宜  
一謹產地之收曬閩省鹽場福清最大請倣保甲  
法添設團長甲長查報日曬之鹽設總倉封鎖以  
杜私賣且免雨水之患修砌莆田各團鹵窟以資  
防護一嚴銷地之售賣閩鹽向係商行後改官運  
近用水客肩販請暫令水客認銷而以官運接濟  
三年無悞報部充為商人再發引以立成法場鹽  
多產之時仍照官運例動課取積一定鹽課之額

數閩省鹽課有額徵公費二項請照定數作正額其溢行之鹽所獲銀數造為盈餘報查除支給鹽道各衙門公用外餘造冊奏銷解部水脚即於長價等項內撥納一酌辦理之人員閩省舊設鹽務各官雍正二年裁汰請嗣後於佐雜官內遴辦無庸另設下部議行六月以原任山西道御史蕭震於康熙十三年遭耿逆之變與原任邵武府知府張瑞午等合謀討賊事洩身殉妻妾媳婢同時死

節瑞午業蒙卹典而震獨遺疏請入鄉賢祠致祭  
旌其門

詔如所請七年六月因與臺灣革職知縣周鍾瑄濫致書  
扎又未審出加徵耗穀各實情部議革職

命降三級留任尋疏言閩省戰船多係平臺灣時所獲長  
濶不稱請酌定丈尺隨時更改閩安協左營之船  
多鐵板沙線請改為平底以適進哨之用又請改  
福建同安泉州長福邵武四營遊擊為叅將增設



灌口安海二汎守備各一移泉州府糧捕通判駐  
安海汎連江縣守備駐東岱汎移東岱汎千總駐  
可門汎部議從之閏七月來京

陞見

御製詩

賜之有操凜冰霜功帶礪匡時重鎮眷良臣之句八年二  
月晉太子太保四月回任先是

上以其倬通曉堪輿術

命詰

福陵恭視形勢工程其倬奏言

陵前左畔水法因夏日溢流稍更故道弓抱之勢微覺外  
張必須順導河流方稱盡善至是大學士等議如  
所奏濬修五月調兩江總督復

命來京六月疏叅巡臺御史李元直任性滋事狀下部察  
議元直降三級調用九月以其倬隨怡賢親王允  
祥相度

萬年吉地於易州境內泰寧山太平峪

特授一等輕車都尉世職併前所得騎都尉為三等男

諭曰高其倬歷任封疆其樹績建勲揚名垂譽者不可悉數原不以此為宣力見長之地乃能悉心籌度務期萬全無一毫瞻顧推諉實出於一片忠愛至誠之惻不僅才識超羣已也是月

命署雲貴廣西總督九年疏言雲南昭通府四面環山請委員專辦墾務定為水旱生熟四項分給兵民課

土各戶墾種按年收穀還本後起科輸米以省兵  
米運費下部議行十一年正月

命仍回兩江總督任會雲南普洱府屬思茅土把總刁興  
國勾苦葱蠻煽元江夷攻普洱府城通關大寨擺  
夷復附苦葱蠻過阿黑江犯他郎地方其倬檄提  
督蔡成貴等分路進剿擒其酋并賊屬五百餘斬  
級甚衆疏至

報聞九月

命以總督銜管江蘇巡撫事十二年以瞻徇知縣趙崑珵承修海塘工程賠項部議降調尋授江蘇巡撫十三年疏叅淮關監督年希堯庇縱玷職

詔嚴鞠削希堯職乾隆元年正月以疾

召還京四月授湖北巡撫尋調湖南二年七月以湖南城步綏寧二縣徭糾黨焚劫其倬偕總督史貽直遣兵分勦賊黨悉平

諭部優敘加三級三年三月擢工部尚書尋調戶部十

月卒於寶應舟次遺疏入

諭曰高其倬練達老成宣力年久今聞溘逝深為悼惜  
著沿途官弁護送回旗尋

賜祭葬如例諡文良

郝玉麟

郝玉麟本漢軍鑲白旗人由驍騎校於康熙三十  
四年授門千總四十四年遷守備累遷雲南援  
勦協副將六十一年擢鶴麗鎮總兵雍正元年九月

授雲南提督八月青海羅卜藏丹津脅衆台吉叛  
劫親王察罕丹津掠青海諸部官兵分路進剿

詔玉麟率兵赴中甸駐劄揚威塞外中甸故屬麗江後為  
青海番所據受羅卜藏丹津偽劄玉麟至宣布

恩威皆畏服上所受偽劄率衆三千五百戶男婦萬七千  
餘投誠納土玉麟安撫夷民清釐戶口請於中甸  
駐兵千阿墩子為扼吭地駐遊擊一兵五百

詔嘉其料理合宜頗著勞績俟青海事竣後下部議叙二

年正月奉

命自中甸進駐察木多招撫夷民七百餘戶四月青海平叙  
功授雲騎尉世職五年三月鎮沅夷不法焚署竄  
囚玉麟同總督鄂爾泰發兵分勦擒首惡置之法  
夷民漸復業事

聞

諭嘉玉麟公忠為國能鼓勵弁兵奮勇報効六年二月茶  
山所屬夷民劫客商拒捕傷官玉麟同鄂爾泰調



兵進勦擒首逆安撫餘黨後以車里土舍刁正彥  
狡詐煽惑夷民欲擒治正彥聞風潛逃玉麟於猛  
腊生擒之由猛崙慢林至思茅普洱元江一帶親  
勦以茶山袤延千餘里普洱思茅為咽喉九龍江  
橄欖壩為藩籬與交趾莽子老撾毘連更有慢達  
等五渡口緊要且幅員遼濶宣尉司刁金寶不能  
兼顧土產普洱茶外有鹽井厥務必劃明界址設文  
武官彈壓列疏入奏得

旨嘉獎五月部議茶山功授玉麟都督同知九月烏蒙所屬大關米貼土婦陸氏作亂玉麟遣兵勦獲陸氏及賊黨設塘汛十二月刁正彥餘黨作亂玉麟領兵二千進攻追擊至橄欖壩渡整哈江奪渡口又率遊擊郭佑民徐成貞等夾擊賊大敗擒逆黨招撫夷民五百餘戶

上嘉其辦理妥協七年正月以雲南慶雲見

特旨授玉麟騎都尉世職三月授廣東總督九月奏言廣

州府屬香山廣海新會交界傍海依山多巨盜嚴飭水師巡哨於香山三虎海面見賊船七追至廣海獨涯清水灣海面戮盜犯及傷溺者二十餘人擒盜首李奕揚夥盜楊亞干等二十六人訊供積盜有陳大樂王亞七梁國柱現搜捕務獲

諭曰此案非尋常獲盜可比所有將弁照軍功例議叙又奏查出粵東官運官銷之埠羨並各商請按引增課每年六萬兩請帶銷舊引以三年為滿諸疏入

諭曰觀爾所奏無非以清楚錢糧為要務不特輕重本末失宜粵省民情惟利是趨似此亦不甚相協果能令吏治潔清民情淳樸自漸臻弊絕風清若不於根本處著力而逐末辦理豈但不勝其繁亦何有吏畏民懷之期耶八年正月奏移廣東定海縣青崖司巡檢駐太平汎儋州安海司巡檢駐薄沙汎崖州抱歲司巡檢駐安樂汎添設瓊山縣水尾司巡檢一萬州寶府司巡檢一裁儋州倉大使一瓊州府司獄一從之三

月奏言訪得逸盜王亞七陳大樂潛聚新會縣北  
峯黃陽各山梁國柱匿新會縣古兜山已檄弁兵  
分獲其夥黨李亞三張亞八余文禮等亦就擒查  
新會縣北峯南峯二山向有柴場一汛於香山新  
會廣海三營每年輪撥官兵駐防今久廢請照向  
例防守

上嘉允之五月奏言廣東肇高廉羅道駐肇慶府控制千  
里外之高廉二府雷瓊道所轄雷州府在海北瓊

州府在海南俱鞭長莫及請增設巡道一駐高州  
分轄高雷廉三府改肇高廉羅道為肇羅道雷瓊  
道為海南道並請將高雷廉道海南道及舊惠潮  
道俱加兵備銜六月又奏改廣東營制事宜一移  
左翼鎮標右營遊擊駐蘆苞口汛一改新會營遊  
擊為叅將增守備千總各一把總四兵六百七十  
七與原設者分左右二營隸叅將管轄一增河頭  
汛都司千總一把總二兵四百兼防甕崗石窩龍

逕各汛歸羅定協統轄一龍門營改隸增城管轄  
改增城營遊擊為叅將一抽調廉州營把總一兵  
九十再募兵三十歸化石營一改崖州營遊擊為  
叅將增千總外委各一兵百十八一移原防市橋  
之虎門協都司駐南村並移番禺縣縣丞同駐一  
廣州春江二協以副將專管毋庸隸左翼鎮標并  
增廣州協千總外委各一兵一百四十五一左右  
翼鎮標五營及增城營俱無守糧應改戰為守與

通省畫一并增右翼鎮標兵三百四十五一增香山縣縣丞一駐前山寨調原駐之守備於縣城八月請增吳川縣廂州巡檢一九月請復設潮陽縣縣丞一十一月請增潮州鹽知事一俱如所請行九年四月奏言海豐縣之甲子捷勝二所應改置一縣於東海窖建縣治設知縣典史各一移海豐縣訓導為新設縣訓導改原駐東海窖千總為新設縣城守營千總東海窖巡檢為甲子城巡檢汕



尾巡檢為黃沙坑巡檢俱隸新設縣轄又奏言新  
會開平兩縣界地名大官田距縣治遠請增置一  
縣設知縣訓導典史各一分新會藥經司巡檢隸  
新設縣轄俱下部議行尋定東海審新設縣曰陸  
豐大官田縣曰鶴山又奏裁澄海縣河泊所大使  
改設樟林鎮巡檢一裁平海大城海安大鵬雙魚  
五所改設平海所巡檢一增新安陽江三縣縣丞各  
一駐大鵬雙魚二所城裁陽江縣太平驛陽春

縣樂安驛驛丞於太平地方設巡檢一十月請改  
化石營守備為都司瓊州興寧和平碓州東莞三  
水四會那扶等營守備為都司十二月奏言長寧  
縣之老虎坳及錫場山翁源縣之礮下鄉各設汛  
一設外委把總駐防又請增礮下鄉巡檢一俱下  
部議行又奏言瓊州鎮孤懸海外產米少又龍門  
香山虎門廣海等處兵民稠集商販罕到均應預  
籌積貯請將鹽政節省銀買穀萬六百石分貯各

營春借秋收免加息部議從之十年二月

命署福建總督時臺灣大甲西等社兇番不法王麟赴厦

門料理同提督王郡遣官兵進勦旋撲滅

上嘉其悉心籌畫調度有方下部優叙加三級十一年三

月奏言福清縣依山傍海當孔道其地駐長福營

額兵不敷調遣請於通省各營撥防八月奏臺灣

營制事宜一府治增城守營設叅將一守備千總

各二把總四兵千一南路原設叅將一守備一千

總二把總四兵千不敷分防請改山猪毛口守備  
為下淡水營都司增千總一把總二兵五百合原  
設弁兵分駐山猪毛口及觀音山石井等處一北  
路原設叅將一守備一千總二把總四兵千一百  
二十亦不敷分防請改叅將為副將增都司一守  
備一千總四把總八兵千二百八十分中左右三  
營以都司為中營守備為左右二營分駐諸羅縣  
治彰化縣治及斗六門淡水等汛一安平地方外

控海洋內扼臺郡請設礮臺七并造倉貯粟三萬  
石資兵餉一臺屬田畝丁口漸增請將莊民編保  
甲並設社學教導一臺屬流寓有從前隨征効力  
者請給外委功加劄付即委為社長約束居民三  
年無過準與內地兵以把總相間用一臺灣總兵  
有統馭民番之責請照山陝沿邊例改為掛印總  
兵官十一月奏言福州屬南台居民輻輳舊設巡  
檢千總各一不敷彈壓請移福州海防同知及福

州協都司往駐十二月奏改督標水師遊擊為叅將十二年二月奏改建寧協副將為總兵轄延平一協楓嶺一營三月又請移漳州鎮標守備駐南勝五月奏酌核海疆情形增改府州縣各事宜一福寧地衝要直隸州不足彈壓請改為福寧府設知府通判經歷教授各一增置附郭縣設知縣訓導典史各一同原轄之福安寧德二縣并建寧府屬之壽寧縣統歸管轄一福州府屬古田縣地寥

濶請於雙溪建城增置縣設知縣訓導典史各一  
仍隸福州府管轄一泉州漳州二府俗刁悍地  
廣請改泉州屬永春縣為直隸永春州隸以德化  
大田二縣漳州屬龍巖縣為直隸龍巖州隸以漳  
平寧洋二縣設直隸州知州州同吏目各一改教  
諭為學正部議均如所請尋定福寧府新設附  
郭縣曰霞浦古田分設縣曰屏南六月奏改南安  
仙遊寧化三縣驛丞為巡檢仍管驛永春仙遊各

增巡檢一裁順昌縣仁壽巡檢改設縣丞又改福建糧儲道為分巡糧驛道鹽驛道為鹽法道專管鹽政兼理福廠船工諸疏俱下部議行七月

命來京陛見奉

旨入鑲黃旗十月

上以玉麟才具精神足以貫注閩浙二省仍照舊制授為

閩浙總督十三年三月奏請於臺灣府大東門小南門各設營房南水門北小門各建大礮臺並增



敵樓南路之茹藤港北路之蚊港等處各設礮臺  
府西南一帶礮臺空隙處各設木柵以資捍禦六  
月奏南澳洋面島嶼歧雜歸海壇金門兩鎮分巡  
鞭長莫及請以南澳左營銅山洋汛俱改歸南澳鎮  
巡查並請撥金門鎮巡船二歸南澳如所請行七  
月奏言臣遍歷海寧等縣東西塘並至尖山勘石  
壩工見塊石塘及草塘均宜急修即飭員估奏適  
風潮坍卸者十之八九照舊暫用塊石柴草搶修

但欲垂久遠應照內大臣海望等所估改建石塘  
奈諸臣意見不合每事齟齬將來興舉大工自必  
更致參差臣受

恩深重何敢顧避嫌怨知而不言除堵築尖山石壩工程  
已三分之二其現議海塘工程請

旨另簡賢能大員總理

詔嘉所奏爽直九月奏言浙省山海交錯凡要衝處居民  
稠雜當增員料理請於常山之草萍鎮西安之全

旺臨海之前所天台之平頭潭太平之松門衛瑞安之大學衛平陽之蒲門會稽之曹娥壩仁和之塘棲鎮俱增巡檢一仁和錢塘縣各增主簿一專管江塘水利從之乾隆元年二月

諭玉麟以閩浙總督銜專管福建事先是臺灣彰化縣勦滅之牛罵等三社田畝奉

旨仍歸番民管業部議以番人界內典賣漢人之地畝若民人往耕兩界錯綜難免侵擾應令該督議還歸

結使民番兩界劃然至是玉麟以臺地向係番民  
雜處漢民耕種之地半係番黎契賣而流寓不下  
數十萬人現耕番地數十萬畝若令歸還不但原  
價難追且番黎無力拋荒熟地而漢民無田可耕  
請將現在民番所耕地查明四至註冊存案嗣後  
永不許民買番業部議從之三年五月奏言閩省  
人多田少民食不敷上年福州等府被災奏請截  
留浙漕十萬石并委員赴江南等省買米接濟奈

未及月餘浙漕糶完兵民日食仍不敷請於江南  
買回米內酌糶再撥藩庫銀十萬兩赴江廣等省  
採買並請

勅發江西倉穀二十萬石湖南十萬石運閩以濟窮黎得  
旨允行九月

諭玉麟仍兼管閩浙兩省事四年三月奏言閩省偶遇  
歉收兵丁每虞艱食沿海各鎮已有儲穀其餘各  
營計兵一名貯穀二石共六萬一千六百石請以

節省生息銀採貯於兵食有濟六月又奏閩省沿海鹽場離郡縣甚遠曬丁待食常平倉穀每艱輓運查閩省辦課有匿報鹽斤等弊按所犯酌罰陸續買穀萬石檄鹽道於曬丁最多離城最遠之福清場貯穀五千石蒲田場貯三千石餘各場視可以建倉處次第經理諸疏入俱得

旨嘉獎七月擢吏部尚書十一月

命署兩江總督先是

上聞福建漳州府知府王德純居官劣蹟

勅革職令署福建巡撫王士任秉公嚴審至是御史朱  
續暉奏言風聞現審未結事如王德純一案有與  
督撫關涉處

上命續暉馳驛赴閩會同總督德沛及士任查審尋會  
鞠德純婪贓屬實合疏具題續暉又以會鞠時士  
任袒護王麟欲出其罪心多欺詐具摺另奏

詔革士任職並以王麟身為總督於貪婪不法之王德

純不行糾叅且題陞知府又以才情敏練辦事實  
心保薦

勅部嚴加議處部議降五級調用

諭曰朕命德沛確查郝玉麟曾否收受王德純賄賂今  
據奏郝玉麟止於每年收受王德純禮物並未受賄  
郝玉麟係

皇考簡用之大員久歷外任人亦諳練若照部議降調尚  
屬可惜著從寬降二級調用五年補刑部右侍郎六



年二月因病乞休

上允之九月署閩撫策楞叅奏延建邵道鄂善交結玉麟家人郭姓各款

上命革鄂善職並將玉麟家人嚴審得實玉麟革職十年三月卒

范時捷

范時捷漢軍鑲黃旗人大學士文程之孫康熙三十四年襲一等子兼管佐領三十六年授叅領由

寧夏運米至噶多立軍功議敘一等三十八年授  
廣東南雄副將四十一年六月調廣西潯州副將  
七月遷廣東韶州總兵四十二年調瓊州總兵四  
十七年調陝西寧夏總兵先是鄂爾多斯王松阿  
喇布請於察罕托輝之地暫行遊牧許之五十二  
年八月時捷疏言察罕托輝係版圖內地今蒙古  
遊牧多越界與寧夏民相混於體制不便請以黃  
河為界

上曰前松阿喇布以察罕托輝水草佳茂懇請暫行遊牧並  
未有令永遠遊牧之旨著理藩院查明具奏尋議如時  
捷所請五十七年署甘肅提督雍正元年四月署  
陝西巡撫九月實授二年十月疏請裁潼關榆林  
靖邊等衛守備千總及教職等缺移華陰縣丞駐  
潼關各衛所錢糧歸併附近州縣管理生童歸該  
管州縣考試潼關應支兵糧就近改撥潼商道收  
支從之十一月來京三年三月授鑲白旗漢軍都

統五月疏劾川陝總督年羹堯欺罔貪婪五款一  
運米至軍前侵蝕腳價銀四十餘萬兩一管理駝  
米勒取私費三十萬兩一違

旨派勒屬員捐俸興工一與將軍督撫文書擅用令諭直  
書官名一保舉題補各官多營私受賄又劾東河  
運使金啟勲附年羹堯生事擾民啟勲逮下獄治  
罪年羹堯罷為杭州將軍詳見年羹堯傳五年六  
月兵部叅奏時捷等引

見人員班行不整應革職

諭曰范時捷乃年羹堯門下鷹犬年羹堯稱其才品超羣滿漢官員無與比並及年羹堯事敗其案內牽連范時捷之處甚多朕俱不行究問且念其為勲臣之後仍畀以都統重任料伊自必感朕深恩力圖報効乃歷年以來見其辦事昏庸奏對糊塗並無絲毫効力一事可取之處揣范時捷之意或以朕處治年羹堯之故觖望於心不肯黽勉亦或才具本屬不及向因工於諂媚故年

羹堯揄揚太過乃至今日底裏畢現耶范時捷著革去都統在侍衛上行走朕非因偶爾失儀一節處分大臣也八年正月授散秩大臣總理

陵寢事務七月時捷兄時繹因協理河東河務誤工革職十月以時捷授古北口提督

諭曰范時捷係開國名臣范文程之孫乃不念國家培植之恩并不思祖宗積累之厚其在陝西為官時甘心出年羹堯之胯下諂媚逢迎以至辱身賤行為人所鄙笑

朕令其來京辦理旗務而伊志氣昏庸委靡不振無心為國家出力是以降為侍衛以示懲戒繼因

陵寢地方辦事需人將伊命往今范時繹獲罪罷黜范氏子孫竟無現居大員之人范時捷尚非棄才可此是以令其管理古北口提督事務觀其如何改過自新一洗從前之媿恥直隸總兵官俱聽范時捷節制十二月調署陝西固原提督九年正月寧遠大將軍岳鍾琪奏甘肅固原肅州兵丁撥二千人出口內地應募

補固原召募之事令時捷辦理四月協辦西寧總  
兵官事六月署大通鎮旋仍署西寧總兵十年六  
月奏修西寧鎮邊牆

命興工督修乾隆二年九月偕西寧辦事大臣保祝奏請  
多倫尼託克圖例交馬價准作次年正賦

上是之閏九月因患病奉

旨來京以散秩大臣行走俾得調理三年四月卒

欽定八旗通志卷一百九十二